

Anninnu di notti di luna

Detimi l'accunoltu di lu pientu
chi troppi 'olti abali m'esci a via,
candu la 'ita no agatta assentu
e più baldanza no ha l'alligria.
Frondi chi feti musiga lu 'entu,
detimi lu sigretu d'almunìa,
candu lu cori ha disiciu d'abbentu
palchì abbatti la malincunìa.
Sèti anninnu di notti di luna,
di spiranza dunosa lu cunsolu,
luci di stella cun pena nisciuna.
Sèti sinzeru una cadenza solu
chi boci 'ostri accoddhi tutti in una,
canzona chi suai ha lu so' bolu.

Lolghi di fumu

Chi pena l'ultima sera
chena una stella ancora!
Di soli l'ultima spera
s'è ispinta mori mori
und'abà no s'aspetta
da l'umbra paci sinzera,
illa carrera, fora.
Malincuniosu un zigarru,
chici, abali, lacatu
a banda, sminticatu
come spola di tela,
frazza una brasgia stena
e a l'appusentu rigala
lolghi di fumu in bolu,
cu la flema liceri
d'un lumu di candela.
Diventani, chissi lolghi,
specchju suai d'ammentu
cun magghjuni sculuriti
di tempu di 'ita in fiori
turat'a lu pinsamentu;
di momenti sireni
d'anni d'età minori
di li tempi passati,
cun richjami d'amori
guduti o sunniati...
Ansii di solti middhori
in ameni 'isioni
e timpesti finuti
a ali infusi calati.
Ma invanu cussi s'agabba
di cinnara in tristu cunsumu
lu zigarru cadutu
da manu scunsulata
d'un vacchju chi prisumu
altu no ha che d'un sonnu
abali, a capu appugghjatu
a l'azza di la banca,
in signu di dà paldonu
pa' tuttu lu chi li manca.

Paesi

Ansia di paesi poaru, casi di petri 'icini,
sureddhi in disisperu, senza lussu e calcina.

Acciuttulati murini di stritti
sutt'a unu celi chi no ha fini.

Mi dummandu

cos'è chici la 'ita:

disiciu d'un altu dumani,

disiciu d'un altu pani

chi legghju in dugn'occhj mutu

di ghjenti pusata a lu soli.

Aspittà in biddhuti sculuriti

l'invitu chi veni da la tarra

cu la so' alba spinta

pa' li cheddhi famiti.

O chist'arricà l'ea illa pinta

da la funtana amica,

in brocchi di 'eldi 'ecchju

pa' laà l'appusentu.

Chi tuttu fussia volaria

sonu di campana cuntentu

e tuttu gala di musiga

dapoi di lu 'esparu lentu.

Però mi pari chi tuttu

sia illa mustra di fiori rui

chi un balcu bastaldu

faci a lu celi biaittu.

Poaru balcu,

chi come noi ha la folza,

cu la so' furia di sangu

di fiurì comu po',

da una simenza chi lu 'entu,

in una petra calputa,

laca't'ha illu campanili

misaru di la ghjesgia.

Semini

Esse ispica in ghjuu assuliatu,
matura e via, candu lu stiu è folti
e l'alba drommi in fenu dissucchjatu.

Spiranza esse riposta d'una solti
di semini chi drommi in cori a varru,
ma in sonniu di rinnòu, a primmaèra.

Aspittendi cunfoltu da la notti,
pensu cussì, cand'in bolu liceri
veni la sera e anninna omini e fèri...
Boci di steddhj no ha più la carrèra,
alta alligria hani li ghjanni chjusi
cun richjami di cena.

E la spica diventa la me' pena,
tandu, in ora suài,
e si sgrana illu ghjùu ch'agghju piantatu,
chena fultuna mai.
A granu a granu l'agghju accapitatu,
laurendi la 'ita a bona lena,
sempri luttendi in briu, a soli e ventu:
granu a granu di pientu,
cun canche aiciu d'abbentu,
come lu poaru babbu,
massaiu mintuatu.